

纪晓岚诗文集

一函
四册

精選

紀曉嵐詩文集卷二

清河間紀曉嵐先生著

後學

山陰湯壽潛
會稽蔣抱玄
超氏點校

表四

選一首

原三首

欽定四庫全書告成恭進表

原上編卷六

臣等奉勅編纂四庫全書告成。謹奉表上進者。伏以天璣甄度。書林
占五緯之祥。帝鏡懸光。藝苑定千秋之論。立綱維於鼇極。函列雲珠。
媲美述於龍蹲。契昭虹玉。理符心矩。絜三古以垂謨。道叶神樞。匯九
流而證聖。治資鑒古。德洽敷文。臣等誠歡誠忭。稽首頓首上言。竊惟
神霄九野。太清耀東壁之星。懸圃三成。上帝擴崑西之府。文章有象。
翠嬀遂吐其天苞。繪畫成形。自阜肇圖其地絡。書傳蒼頡。初徵雨粟
之祥。錄授黃神。始貯靈蘭之典。洞庭祕簡。稽大禹所深藏。柱下叢編。

付老聃以世守。秦操金策。聖籍雖焚。漢理珠囊。遺經故在。儒生密寶。維孔鮒之承家。謁者旁求。見陳農之奉使。蝌文以後。篇章自是滋多。麟閣所儲。條目於焉漸備。杖吹藜火。夜讎別錄之編。衣染鑪香。坐校中經之簿。王仲寶區其流。別定新志之九條。阮孝緒撮其叢。殘括舊傳之五部。勘書妙畫。世摹展氏之圖。捲幔飛仙。史載隋宮之蹟。唐武德訖乎天寶。鈿軸彌增。宋景祐繼以淳熙。牙籤再錄。南征俘王。元遷三館之幘。北極營都。明運十艘之櫝。莫不前徵邃古。丹壺溯合雒之蹤。毖發空林。青簡狁頻斯之篆。西州片札。辨點漆於將磨。南雍殘文。檢穿絲於已斷。竹編未朽。名認師春。瓠本猶攜。藁存班固。爬羅纖碎。或得諸玉枕石函。掇拾畸零。均給以螺丸麻紙。精鏤廣購。一篇增十匹之酬。華豐重緇。三品別兩廂之等。凡以窮搜放失。獵文林辨囿之精。互鏡瑕瑜。立聖域賢關之訓。結德輿而輶轄。軌順經涂。俋學海以

沿波源。通道筏。然而掇餘易匱。四千卷既丐殘膏。驚廣彌蕪。百兩篇更珍贗鼎。丹青失實。或貽誚於王充。朱紫相淆。孰齊蹤於鄭默。甚乃別風淮雨。惜奇字而偏留。或如許綠紉紅。踵駁文而莫悟。蘭臺度貯。多如賄改漆經。棗板摹傳。遂至誤尊閣本。故祕書總目。鄭夾漈復議校讎。而文苑英華。彭叔夏重加辨證。從未有重熙累洽。斐華懸紫極之庭。稽古崇儒。冊府闢丹宸之館。彌綸宙合。識大識小之無遺。榮鏡登閎。傳信傳疑之有準。金模特建。寶患周融。如今日者也。欽惟皇帝陛下。瑞席蘿圖。神凝松棟。播威棱於十曲。響震靈夔。洽文德於四溟。兆開神鷲。帝嬌歌詠。已懸九萬瓊牋。臣向編摩。更緝三千寶牘。博收竹素。仍沿天祿之名。珍比琳瑯。永付長恩之守。乃猶尋端竟委。溯支絡於詞源。緯地經天。探精微於義海。昭陽韶歲。特紬翰府之藏。永樂遺編。俯檢文樓之帙。例取諸吳興韻海。割裂雖多。體宏於孟蜀書林。

蒐羅終富。榛楛宜翦。命刊削其譌言。瀝液堪珍。勅比排其墜簡。焦桐漆斷重膠。百衲之琴。古壘銅斑。合鑄九金之鼎。復以羽陵蠹剩。或有存留。宛委藏餘。不無佚漏。十行丹詔。徧徵汲古之家。七錄紺囊。廣啓獻書之路。逸經斷策。出自大航。雜卦殘篇。發從老屋。錦帆振舵。孟家東洛之船。玉軼飛鈴。吳氏西齋之軸。鱗排玉字。多王粲之所未聞。筍束金繩。率張華之所莫識。光明繭紙。朱題芸帙之名。蟠屈鸞章。紫認槐廳之印。紅梨隔院。曹司對設於東西。鏤濡香品。第詳分其甲乙。天潢演派。光連太史之河。卿月澄暉。彩接文昌之宿。總司序錄。叨楊億之華資。分預校讎。別任宏之清秩。銀袍應召。驤雲路以彈冠。粉署徵才。記仙郎而題柱。懷鉛握槩。學官願効其一長。切線割園。博士亦研其九術。遂乃別開書局。特分署於龍墀。增置鈔胥。競抽豪於虎僕。圖與史並陳左右。粉本鉤摹。隸與蝌兼備古今。絲痕蠅扁。曹連什五。各

隸屬於寫官。工辨竄良。均稽研於計簿。提綱挈領。董成者職。總監修補闕拾遺。覆勘者官兼詳定。庀器預儲於將作。斐几筠簾。傳餐徧給於大官。珉糜珠餡。溫鑪圍炭。紋凝鶉鴒之青。朗覽涵冰。色映玻璃之白。花甌入直。地同兜率。天宮蓮炬。分行人到。瑯嬛福地。瓊箱牒送。全搜膾囊。帷蓋之餘。芝殿籤排。共刊木扇。金華之謬。程材效技。各一而使吹。累牘連篇。遂多多而益辦。香霏辟惡。擁書何止百城。瀋漬隳糜。削橐。甯惟兩屋。譬入衆香之國。目眩瞀於花光。宛遊羣玉之峯。神愕眙於寶氣。豈但鴻都多士。駭聞見所未曾。實令虎觀諸儒。辨妍媸而莫決。所賴恭承睿鑒。提玉尺以量才。仰稟天裁。握銀華而照物。初披卷軸。共掇零璣。卽荷絲綸。務礱完璧。吳澄易翼。辨顛倒乎陰陽。楊簡詩音。斥混淆乎周漢。稗官勦說。刪馬角之荒唐。譯史傳聞。摘象胥之譌異。醮章祈福。發凡於劉跂之詞語。錄參禪示例於齊熙之記。固

已南車指路。陟道岸而衢亨。北斗旋杓。揆文星而度正。泊乎羣書大
集。品雜金沙。聖訓彌彰。鑒澄珠礫。詰經忌鑿。錯簡於龜文。論史從
公。溯編年於麟筆。立言乖體。四明之錄必刪。贗古誣真。五柳之名宜
辨。七籤三藏。汰除釋老之編。五臺九奸。排斥中韓之術。毒深孔雀。無
容校寫其青詞。巧謝璇璣。未許增添其錦字。小山豔曲。削香奩脂盞
之篇。金谷新詞。刊酒肆歌樓之句。凡皆詞臣之奏進。誤點丹黃。一經
聖主之品題。立分白黑。至於銅籤報夜。紫殿勤披。玉案開緘。丹毫親
詠。五家易說。歧塗附闢。其傳燈四氏書箋。餘緒兼詳乎括地。前車後
鑒。陳風雅於經筵。斜上旁行。寓春秋於世本。廬陵處士。特申僭上之
防。安定門人。大著尊王之義。王元杰。名同讞獄。爲雲谷之重儆。洪咨
夔。跡類探囊。竊玉川之餘瀋。四箴誤註。甯知顏巷之心。二佛同稱。轉
隘尼山之量。六經作繪。全收諸楊甲圖中。七緯成編。知出自莊周書。

後五音分配。篆文互備其形聲。二史交參。奇字各通其假借。古香醢
醵。細辨班書。碎腋穿連。重刊薛史。清流肇釁。示鑒戒於東林。正統明
尊。存綱常於西蜀。派沿凍水。袁朱之新例兼存。俗記扶餘。班范之訛
傳並訂。黨碑再勒。嗟揖盜而開門。權燄彌張。嗤教星而替月。西湖游
蹟。殊憐野老之藏名。北使賓筵。深陋詞臣之校射。宋鈔僅贗。蒐舊志
於臨安。金刻稀聞。寶遺文於貞觀。或攻或守。徒從十鑑之兵謀。相勝
相生。未信五行之德運。建炎政草。愧彼中興。至正刑章。斥其左袒。李
尊洛學。辨道命於天原。酈註桑書。剖源流於地理。史腴詳摘。有逾漢
雋之精。經笥懸探。更勝曹倉之富。至於孔庭舊語。首定儒宗。蔡帳祕
文。嚴排異說。范祖禹之帝學。具有淵源。會公亮之武經。姑存崖略。橫
戈危堞。節取陳規。握策靈臺。參徵蘇頌。算窮杪忽。九章研鮑瀚之藏
術。雜縱橫。十卷稽趙蕤之撰。楚中隱士。互權韓柳之評。婺郡名賢。不

廢呂唐之學。臚登讖記。衍洪範而原非。妄議井田。託周官而更誤。錢唐遺事。深譏首鼠於宋元。曲洧舊聞。微憾操戈於洛蜀。絀聰有取。旁通方朔之言。指佞無難。慎聽韓非之說。陳思書苑。列筆陣而成圖。馬總意林。舉詞條而擢秀。黃伯思之博洽。石墨精研。孫逢吉之淹通。雲龍遙溯。多知舊事。病歌舞之銷金。一洗清波。笑詞章之諛墓。太平御覽。徒粉飾乎嘉名。困學紀聞。偶抨彈其迂論。晚唐小史。入廚寧取乎。卮言南宋。枝談按鞫。深嫌其曲。筆十七卷。騷人舊製。更證以草木之名。二百年吏部清吟。特賞其煙霞之氣。兼推韓杜。續來鳳背之膠。並採郊祁。擬以棠華之句。文恭著作。先歐尹而孤行。忠肅風裁。抗蘇程而角立。勤王留守。呼北渡者。凡三殉節。侍郎壯南朝者。惟一學如和叔。原不限以宗朱。詩到儀卿。乃轉嫌其入墨。讀書祕閣。明詹初論古之非。從宦金淵。賞仇遠耽吟之癖。楊維禎取其辨統。而頌莽則當誅。

劉宗周閔其完忠而吠堯爲可恕。凡茲獨斷。咸稟睿裁。懿此同情。實孚公義。苞千齡而建極。道出於天。綜百氏以歸型。言衷諸聖。權衡筆削。事通乎春賞秋刑。絜度方圓。法本乎乾規坤矩。是以儀璘懸耀。揆景鳧趨。鏞棧先鳴。聆音鑿集。鯨鐘方警。啓蓬館以晨登。鶴籥嚴關。焚蘭膏以夜繼。披文計數。甯止於萬七千篇。按月程功。務得夫四十五日。裁縫無迹。先成綴白之裘。傳寫相爭。齊炙汗青之竹。架羅黃卷。積盈有似於添籌。几擁烏皮。刊謬時防其掃葉。畢昇活板。漸看字是排成。曾鞏官書。已見序稱校上。如以乾行至健。七旬之念典彌勤。離照無遺。一字之褒譏恆審。梁騶練士。庚郵遞初寫之函。雲輅巡方。乙夜展重修之卷。至三至再。戒玉楮之遲雕。數萬數千。摘金根之屢誤。坤原爲釜。兼搜刊板之訛。芋或作羊。細檢鈔書之謬。豪釐不漏。戢旁添待補之戈。塗黠必嚴。羅上辨續加之罔。削除不盡。時飭以妄下雌黃。

輪郭空存。常指其竟同曳白。明周纖芥。共欽睿照無遺。報乏微涓。彌
覺愧心生奮。若夫考勤校惰。督課雖詳。荷寵邀榮。恩慈實渥。風雲得
路。先登或列於九官。雨露均滋。中考亦賜以一級。柏梁聯句。聽鳳律
之新聲。芸署題名。踵麟臺之故事。墨勻蝶翅。祖帖雙鉤。帙簇龍紋。天
書五色。猩毛擢穎。憾魚子之華牋。龍尾雕紋。融麝煤之芳氣。銀罌翠
管。細索百和之香。錦段香羅。交映五明之扇。繡囊委佩。鋌貯朱提。珍
毳豐茸。帕裁白氍。雕盤列飮。果分西域之甘。華俎嘗新。瓜勝東陵之
種。自天宣賜。多非夢寐所期。無地酬恩。惟以文章爲報。周賅始末。擬
勒長編。別採英華。先爲縮本。曩長庚之紀歲。慶叶嵩呼。屬太乙之占
祥。象符奎聚。八年敬繕。挹古今四庫之精。兩部分儲。合大小二山之
數。惟全書之浩博。實括羣言。合衆手以經營。倏逾數載。香薰蘭櫝。方
粗就而未終。閣聳雲楣。已先成以有待。文河疏瀹。初如江別爲三。筆

海朝宗。繼乃瀆增以四。望洋無際。慮創始之爲難。登岸有期。幸觀成之可冀。較刪繁之別帙。又閱兩年。勒總彙之鴻裁。已盈一部。插籤分帙。次按乎甲乙丙丁。列架臚函。色別其赤青白黑。經崇世教。貴實徵而賤虛談。史繫人心。削誣詞而存公論。選諸子百家之粹。博收而不悖聖賢。懲十人九集之非。嚴汰而甯拘門戶。上沿虞夏。咸挹海以求珠。下采元明。各披沙而見寶。六千篋。璋分圭合。延閣儲珍。二百卷。部次州居。崇文列目。釋名訓義。因李肇之解題。考異參同。近歐陽之集古。事稽其實。循文防誤。於樹萱詞。取其詳。求益非同於買菜。人無全美。比量其尺短寸長。語或微疵。辨白其玉瑕珠類。一經採錄。真同鯉上龍門。附載姓名。亦使蠅隨驥尾。元元本本。總歸聖主之持衡。是是非非。盡掃迂儒之膠柱。至其盈箱積案。或汗漫而難尋。復以提要鉤元。期簡明而易覽。譬諸典謨紀事。別行小序之一篇。類乎金石成書。

先列諸碑之十卷。分綱列目。見義例之有條。按籍披圖。信源流之大。備水四瀛而山五岳。俾此壯觀。前千古而後萬年。無斯巨帙。蓋非常之制作。天如留待於今。而希有之遭逢。人乃躬當其盛。叨司校錄。實忝光榮。臣等功謝囊螢。識同闕豹。鑽研文字。未能脈望之逢仙。延緩歲時。僅類鞫通之食墨。仰蒙訓示。得聞六藝之源。曲荷寬容。許假十年之限。百夫決拾。望學的而知歸。一簣成山。營書巖而幸就。欣陳寶笈。對軒鏡之澄光。恭進瑤階。同義圖之永寶。從此依模範狀。若疊矩而重規。因之循軌知途。益輕車而熟路。先難後易。一隅可得。而反三謀。始圖終。百里勉行。乎半九。精心刊誤。八行細檢。朱絲協力。鳩工萬指。齊磨烏玉。連綿告藏。竚看四奏天闕。迅速先期。不待六更歲籥。人文成化。帝機運經緯之功。皇極敷言。王路示會歸之準。觚梭雲構。鬼峨乎銀榜璇題。方策星羅。珍貴乎金膏水碧。曰淵曰源。曰津曰溯。長

流萬古之江河。紀世紀運。紀會紀元。恆耀九霄之日月。並五經以垂訓。道通乎丹書綠字之先。合六幕以同文。治超於元律蒼牙之上。臣等無任瞻天仰聖。踴躍歡忭之至。謹奉表恭進以聞。

此集中第一篇大文字。蓋四庫全書開館。吾師卽奉命總纂。自始至終。無一息之間。不惟過目不忘。而精神亦足以相副。經手十年。故撰此表。振筆疾書。一氣呵成。而其中條分縷晰。纖悉具備。同館爭先快觀。莫不歎服。總其事者。復令陸耳山副憲吳稷堂學士合撰一表。屬吾師代爲潤色。改就終不愜意。仍索此表。書兩人銜名以進。乃高宗純皇帝明鏡高懸。謂此表必係紀某所撰。遂特加賞一分。咸驚睿照之如神也。今刻八集中。謹識於後。門人劉權之。

露布五

選一首

原祇一首

平定兩金川露布 全上

臣聞威揚星鉞。非螳斧所能支。怒奮雷礮。雖蠶叢而亦闢。應天者勝。定申四冢之誅。恃險者亡。難負三苗之固。故王師仗順。歷百戰而無前。逋寇偷生。終一朝而就繫。靈夔震吼。西人之膽全寒。雄虺摧藏。南粵之纓遂繫。恭承睿略。已縛渠魁。竊惟兩金川者。俗帶蠻荒。人原羌族。金牛闢道。爲五丁未鑿之餘。玉斥分疆。在一水相連之外。九氏雜處。率遺種於冉駹。八國參居。盡隸名於默啜。路通的博。問唐戍而皆迷。郡接汶山。出漢封而更遠。蓋四萬八千歲。後至建興。始控以城。而五百六十人。中在嘉靖。尙名以寺。羈縻勿絕。古來徒繫虛名。叛服不常。此輩遂成天性。泊我朝龍驤討罪。初定峨岷。狼種傾忱。全收印笮。桃關置堠。已歸版籍之中。幢布輸賓。久定臣民之分。百年培養。漸如奚別。東西兩部區分。遂似宛名大小。沐天朝之雨露。各長子孫。割蠻

土之山川自成聚落。而乃中山狡獸。最解忘恩。西部遺羌。從來善盜。苞藏桀黠。縱橫黃石之墟。突肆貪殘。蹂躪青衣之外。吠同蜀犬。忽爭骨以磨牙。毒類巴蛇。竟擘山而掉尾。往者戊辰之撻伐。玉弩騰芒。實因郎卡之憑陵。銅頭興暴。乃以驚弦落羽。梟不東飛。負矢哀鳴。鵲知北向。天心仁虔。許還松堡之師。聖度宏寬。容免竹王之戮。凡以綏柔荒裔。俾板楯之知歸。何期孤負深恩。仍夜郎之自大。爪牙暫戢。密蓄機心。羽翼未成。轉修舊好。吐蕃嫁女。羈勃律之歸。唐汧罕釋讎。結先零而窺漢。陰謀未遂。十稔先盈。遺孽猶存。九嬰彌亂。凶殘有種。索諾木廸復爲蛇。貪冒無知。僧格桑狐。因假虎。莎車構怨。稱戈鄯善之城。般囑興戎。喋血羅支之帳。四鄰俶擾。月明而軍析宵驚。二豎披猖。風吼而戰雲晝起。釁生同室。雖爲蝸角之爭。境接中原。漸慮犬牙之錯。屢吹毒燄。似聞旺烈遺風。敢播謠詞。擬逼姜維故壘。蓋兩階千羽終。

莫格其頑心。八陣風雲自宜申其顯討。乃以邊臣計左。未能宣布天威。閫帥謀疎。無以欽承廟算。始則印歸印谷。陽受約而彌驕。繼乃城屬兜題。已失巢而復得。僧格桑投林。免將三窟之重營。索諾木振羽奇鷁。更九頭之彌黠。借降人以用謀。初同婦嫁維州。留部長而不歸。正似王囚阿惡。迹其質渠以割地。具有深謀。足知挾衆以窺邊。終爲後患。敢圖悖逆。金云罪已通天。苟不剪除。深恐勢將滋蔓。皇上是以威操湯鉞。迅調銅符。武震軒夔。重開玉帳。乾隆癸巳六月。詔以臣阿桂爲定西將軍。以臣豐昇額臣明亮爲之副。握虎鈴以命將。星動河魁。引鶴列以陳師。風馳山子。旗分柳綠。滇黔秦楚之兵。糯暎花紅。彭濮微髻之卒。宣明賞罰。令嚴而壁壘一新。簡汰疲癯。氣奮而笳簫倍響。復以禁中羽騎。初時未果從征。因而城上蜚弧。所向莫爲前導。牙璋飛召。爰蒐健銳之雄。柁鼓交鳴。併簡索倫之衆。攜來飛矢。天邊